

T 3188/083

114

CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY  
DEC 17 1940

南通志卷之一百六十四

塔佛大學漢和  
國書館珍藏印

藝文二十二

詩二 五言古下

宋

送劉學士知衡州

歐陽修

劉子懶屬書平居惟嗜酒一沐或彌旬解醜湏五斗淡爾  
輕榮利何嘗問無有忍憶四馬歸行爲一麾守湘耐自古  
醇醪酒聞名久簿領但盈几聖經不離口湖田賦稻蟹民  
訟爭隴畝兀爾卽沉冥安能知可否聊爲寄情樂豈與素  
懷偶藏器思適時投刃寧煩手行當考官績勿復困鬢在

送吳仲庶出守潭州

王安石

吳公治河南名出漢廷右高才有公孫相望千歲後平明  
省門開吏接堂上肘指揮談笑閑靜若在林藪連墻畫山  
水隱几詩千首浩然江湖思果得東南守傳鼓上清湘旌  
旗蔽牛斗方今河南治復在荆人口自古楚有材鄙渌多  
美酒不知樽前客更得賈生否

送李屯田守桂陽

泊船香鑪峯始與子相識寄書邗江上詒我峯下石緣以  
湘水竹攜持與南北永懷古人歡不願百金易竹枯歸樵  
蘇石爛棄沙礫尋門得邂逅綠髮皆半白追思少時事俛  
仰如一夕老矣無所爲空知念疇昔常思一杯酒要子相  
解釋出門事紛紛歸卧意還豁聞當上湓水持詔守嶺阨  
方爲萬里別執手先慘戚茲遊信浩蕩山水多所得爲我  
謝香鑪風塵每相憶

湘竹

梅堯臣

劈竹兩分開情知無合理織作湘文簟依然淚花紫淚花  
雖復合疑岫幾千里欲識舜娥心無窮似湘水

涪溪磨崖碑

王禹偁

客舟曉探奇興落涪溪上褰蘿豁遠目所至窮異狀是時  
天宇晴物象自清曠煙開楚山斷千里彌一望遐延極覽  
眺近歷飽搜訪層崖劃中開峭壁摩萬丈顏公英烈姿元  
叟士林仗文詞金石奏字畫蛟龍壯伊子抗塵容所志在  
清賞孤雲寄微踪獨鶴引空杖豈無千載懷亦有高山仰

同遊二三侶相與情頗暢芳蘭薦山庖林瀑洒行帳醉揮  
紫霞觴亂落白雪唱歸舟漫容與潭月吐雲嶂興幽任時  
違心遠覺神王但云諧斯遊何以益清貺

登南嶽

維舟湘水上始觀祝融峯何人尊炎服植此金芙蓉下窺  
俯南極仰攀接層穹昂昂五峯尊同立元氣中陰時變氣  
候衆壑應寡同綠蘿石磊磊噴壑泉濛濛遙灑洞庭雪五  
月飛涼風伊昔禮明禋望秩猶三公靈激出雲雨有禱無  
不通離明無朱雀星紀專化工而我企冥漠覽眺殊未窮  
火黎記昔冢圯剝今無踪營邱秘真圖孤魂竟誰從浮雲  
鳥道沒白日長天空惟應弔虞舜一嘯蒼梧東

周茂叔先生濂溪

蘇軾

世俗眩名實至今疑有無怒移水中蟹愛及屋上鳥坐令  
此溪水名與先生俱先生本全德廉退乃一隅因拋彭澤  
米偶似西山夫遂卽世所知以爲溪之呼先生豈我輩造  
化乃其徒應同柳州柳聊使愚溪愚

朝陽巖

黃庭堅

意欲到愚溪竹輿鳴擔肩染溪昔居人埋沒不知年偶託  
文字工遂以愚溪傳柳侯不可見古木蔭濺濺羅氏家蕭  
東瀟西讀書園笋茁不避道檀欒搖春煙下入朝陽巖次  
山有銘鐫蘚石破篆文不辨李瞿袁嵌竇響笙磬洞中出  
寒泉同遊四五客拂石弄潺湲俄頃生白雲似欲駕我仙

吾將從此遊牽挽遂回船

朝陽洞

邢恕

溪流貫清江湍瀨亘百里龍蛇幾盤紆雷雨忽奔駛石渠  
伏穿鑿怪力祖誰氏突如見頭角虎豹或蹲峙橫江互棟  
柱小艇俄紛委蘋藻翳泓澄松竹蔭厓溪兩山束鳥道側  
岸數魚尾繚然闕深出梵宇疊危址鐘唄雜灘聲亭臺森  
水底凭欄幾遊日策杖時臨履酒杓間茶鐙棋枰延晝晷  
放懷得天倪清肅謝塵滓忽妄女兒縛似接羸秦子顧予  
拙謀身霜髣颯垂耳雅意在延齡丹砂夙充餌焉得茲結  
廬悵念遠桑梓

題濂溪

潘興嗣

鱗鱗負郭田漸次郊原口其中得清曠貴結林泉友一溪  
東南來激灑翠波走清響動靈粹寒光生戶牖我雙歛  
峯隱隱插牛斗踈雲互明晦嵐翠相妍醜恍疑坐中客卽  
是關門叟爲歌紫芝曲更擊秦人在宵然忘得喪形骸與  
天偶君懷康濟術休光動林數得非仁智樂夙分已天有  
斲鼻固未免安能混真守歸來治三徑浩歌同五柳皎皎  
谷中士願言與君壽慙慙後慷慨雜佩貽瓊玖日暮車馬  
徒橋橫莫回首

屏是零陵

汪藻

幽人獨夜時潮落西川根渡口櫓聲急一江煙雨昏城頭  
短長更不寐聽譙門趺坐數千息焚香待朝暾

敬簡堂

煌煌夜方中農隙孟冬月君侯敞齋屏華扁正新揭我來  
適茲時亦有大夫笈清觴不留行晤語得超越更看雷雨  
勢翻動龍蛇窟襟懷真能豁肝膽亦已竭老仙來何方湖  
海氣碑砢君侯斂袂起顛越承履襪主人驚創見引去殊  
卒卒伊今不忍逝頓首願有謁人生均秉彝天造豈停歇  
云何利害判所轄無一髮茲焉辨不早大本將恐蹙吾言  
實自箴君聽未易忽

祝融峯

朱子

衡嶽千仞起祝融一峯高羣山猥突兀奔走如曹逃我來  
雪月中歷覽快所遭捫天滑青壁俯壑崩銀濤所恨無巨  
牯一掣了六鼇遄歸青蓮宮坐對白玉毫重閣一倚徙霜  
風利如刃平生山水心真作貨食饕明朝更清徹再往豈  
憚勞中宵撫世故劇如千蝟毛嬉遊亦何益歲月今滔滔  
起望東山雲茫然首空搔

衡山大雪馬上次敬夫韻

仙人喬嶽頂散髮吹參差喚我二三友集此西南陲列筵  
命洛公侑坐迎江妃導之千羽旄投以萬璧璣繽紛亦何  
麗晻靄難具知衆真亦來翔恍覺叢霄低茫茫雲霧合一  
瓊瑤姿回首謝世人千載空相思吾衰怯雄觀未敢探  
此奇短衣一匹馬幸甚得所隨天寒飲我酒酒罷賡君詩  
人生易南北復此知何時

次敬夫決策登山韻

披風蘭臺宮看雨百常觀安知此山雲對面隔霄漢羣陰  
匝寰區密雪渺天畔峩峩雪中山心眼悽欲斷吾人愛寄  
賞遞發臨河歎我知互寒極見現今當泮不須疑吾言第  
請眎明日蠟展得鴈行籃輿或魚貫

望月亭

張 栻

披衣凜中夜起步祝融巔何許冰雪輪皎皎飛上天清光  
正在手空明皓無邊羣峯儷環列玉樹生瓊田白雲起我  
旁兩腋風翩翩舉酒發浩歌萬籟爲寂然寄言平生友誦  
我山中篇

王長沙梅園分韻得林字

令君五畝園不問蓬蒿深江梅忽秀發邂逅成賞音一笑  
領諸客掃地坐墻陰清芳到酒面落蕊飄衣襟月出未忍  
去起舞獨微吟人自賞晤耳問花亦何心花雖有開落意  
則無古今須君戒勿折嘉實看成林

同元晦擇之遊嶽道遇大雪馬上作

驅車望衡嶽羣山政參差微風忽南來雲霧爲四垂炎官  
捩蓐收從以萬玉妃庭熒亦何有尺璧乃珠璣奇貨吾敢  
居妙意良自知林巒倏變化轍迹平高低喬松與修竹錯  
立呈瑰姿清新足遐寄浩蕩多餘思平生湘南道未省有  
此奇况復得佳友晤言相追隨茅簷舉杯酒旅榻誦新詩  
更約登絕頂同觀霽色時



過胡文定公碧泉書堂

入門認溪碧循流識深源念我昔此來及今七寒暄人事  
幾更變寒花故猶存堂堂武夷翁道義世所尊永袖霖雨  
手琴書賁邱園當時經行地尙想語笑溫愛此亭下水固  
若玻璃盆晴看浪花湧靜見潛鱗翻朝昏遞日月俯仰見  
乾坤因之發深感倚檻更忘言

次韻德美碧泉感舊之什且約胡廣仲伯逢季立來

會上封

相逢傾蓋地回首歎川上士窮不足怪但喜氣愈王凜然  
歲寒姿儒林有龍象棲遲似隱君矍鑠真詩將惟應一彈  
指欲了四大藏舊習想冰消豈復留餘恙新篇更紆餘和

氣與醞釀却思東魯遊幾載南陽葬風霜摧宰木日月隨  
過浪豈期經世心晚歲成獨往蕭然屋半欹使我懷抱愴  
獨有千載傳此事可憑仗細觀宇宙間何得復何喪尚期  
浮雲開衡嶽來見狀秋壑采蘭蓀霜林收栗橡曉看日浮  
空夜賞雪侵帳更憐二三友前山屹相望文會儻來尋勝  
踐天所相妙理湏細論長歌却雄放褰裳請勿疑當仁應  
不讓

路出祝融背仰見上封寺遂登絕頂

我尋西園路徑上上封寺竹輿不留行及此秋容霽磴危  
霜葉滑林空山果墜崇蘭供清芬深壑遞幽吹不知山益  
高但覺冷侵袂路回屹陰崖突兀聳蒼翠故應祝融尊羣

峯拱而侍金碧雖在眼勇往詎容憇絕頂極遐觀脚力聊  
一試昔遊冰雪中未盡登臨意茲來天宇肅舉目淨纖翳  
遠邇無遁形高低同一視永惟元化功清濁分萬類運行  
有機緘浩蕩見根柢此理復何窮臨風但三喟

過洞庭

城頭鷄一號浩蕩風脚圓篙師起相呼牽帆上高桅我亦  
推枕聽波浪聲轟隆窓間試一覘萬頃銀山開附火且安  
坐念此亦快哉良久天平明已見金沙堆泊舟古廟底喜  
色動輿臺我行正長夏及此歲律摧通籍恨亡補敢賦歸  
去來所至有何忙妙處姑徘徊險阻元自平鷗鳥亦不猜  
萬事有定理渠謾費安排明朝上湘水雪意正栽培行矣

一杯酒好在故國梅

五月十六日夜城南觀月分韻得月字

梅收清風來字淨寶鑑揭頻年城南遊未有今夜月呼舟  
泛微瀾遊魚亦出沒危榭倒影浮倚檻涼入骨舉酒屬西  
山寒光動林樾諸君興未已南阜上突兀目極大江流高  
情更超越

三月七日城南書院偶成

積雨欣始霽清和在茲時林葉旣敷榮禽聲亦融怡鳴泉  
來不窮湖風起淪漪西山卷餘雲逾覺秀色滋層層叢綠  
間愛彼松栢姿青青初不改似與幽人期坐久還起步堤  
邊足逶迤遊魚傍我行野鶴向我飛敢云昔賢志亦復詠

而歸寄言山中友和我和平詩

舊聞長沙城東梅塢甚盛近歲亦買園其間念欲一  
往未果也癸巳仲冬二十有八日始與客遊過東  
屯渡十餘里間玉雪彌望平時所未見也歸而為  
詩以紀之

平生客荆楚歷覽非一隅寧知城東路有此梅萬株瘦馬  
踏曉寒清風起菰蒲度溪上平坂頗覺景物殊霏雪下晴  
晝香霧迷前驅近坡與遠嶺玉立同一區老樹固瑰特小  
枝亦敷腹有如衆君子彙聚德不孤精粗無可揀酥酪與  
醍醐千株未覺多此語信不誣班荆或小憩沽酒時一酌  
勝賞諒難盡昭質知不渝我有十畝園邱壑正盤紆念此

綈被侶歲晚與我娛來遊自今始琴書與之俱回首桃李  
場冷淡莫揶揄

七月旦日晚登湘南樓

文書稍去眼日夕進微涼高樓一徙倚清風爲我長漁父  
蔭深樾歸人度浮梁仰看河漢明俯視羣山蒼平生會心  
處於此故難忘舊聞水東勝巖巒發天藏豈無一日暇勇  
往聊徜徉民瘼未渠補况敢懷樂康天邊雲物佳似復爲  
用祥秋成儻可期歲晚或自強當從農家鼓一歷水雲鄉  
望後一日與客自水鄉登湘南月色佳甚翼日用鄉  
字韻簡游誠之

一雨五日餘南州三伏涼喚客近方沼笑談引杯長相將

復登樓月色在屋梁念我懷百憂忽忽髮變蒼及此少自  
舒觴詠未可忘孤光凜下照景妙無留藏沙邊數白鷺欲  
下仍翔祥羣動亦自得如我四體康平生子游子虛白生  
吉祥官舍並樓居登臨筋力強未可效王粲居然思故鄉  
誠之所居正在樓旁自  
中夏以來每攜書獨登

正父還長沙復用斜川日和陶韻為別

吾黨有佳士寡欲自日休眷言平生心從我萬里遊披雲  
度領嶠犯雪臨江流顧我無定蹤飄然若輕鷗茲行雖云  
遠所忻近故邱况得與君俱豈患寡朋儔有酒君為飲有  
句君能酬如何舍我歸頗亦念此不我老百念冷獨有謀  
道憂臨岐無他祝簡編細研求

同遊嶽麓分韻得洗字

遊觀不作難呼舟度清泚新晴宿潦淨羣山皎如洗上方  
著危欄萬象見根柢寒泉白可澗况復雜肴醴高談下夕  
陽邂逅元鑰啓中流發浩歌月色在湖底

嶽麓道旁見穫者

腰鎌聲相呼十百南畝穫婦持黍漿饋幼稚走雀躍辛勤  
既苦為幸此歲不惡王租敢不供大室趣逋約雖云粒米  
多未辦乃升龠姑寬目前饑詎有卒歲樂樂歲尙爾為一  
歉更何托書生獨多憂何以救民瘼

晨鐘動雷池望日

浮氣列下陳天淨澄秋容朝暾何處起彷彿認微紅須臾

眩衆采閭闔開九重金鉦忽湧出晃蕩浮雙瞳乾坤豁呈  
露羣物光芒中誰知雷池景乃與日觀同徒傾葵藿心再  
拜禪曉風

遊南嶽風雪未已決策登山

人言南山巔煙雪聳樓觀俯瞰了坤倪仰攀接天漢勇往  
愧未能長吟湘水畔茲來渺遐想風雪豈中斷行行重行  
行政起白晝歎我聞精神交石裂冰可泮陰沴驅層雲杲  
日麗旭旦決策君勿疑此理或通貫

送宋子華通判長沙

呂祖謙

騷人故悲秋九辨播三楚宋公舊題壁文采照潭府千載  
得君侯遙遙接華譜還當初秋天又進湖湘鱗當寰多勝

事此役可兼取江山日月新似君相勞苦木脫獻羣峯雲  
生失前浦况持別乘權光華動逆旅元戎下分庭百吏羣  
趨廡後車載仁風習習被南土預知黃池盜無復驚抱鼓  
政當勸賣劍不必禁挾弩嶺南鏡面平論賞駢圭組臨分  
一杯酒不爲離愁舉

道鄉臺

潘昉

東坡不謫黃黃應無雪堂道鄉不如斯此臺無道鄉青山  
似其人山靈能頡頏一落名勝手境與人俱香悲吟倚空  
絕臨眺生慨慷

湘中宿臺步寺

沈遼

湘源初甚微屢挹不滿缸比至步臺虛泛泛爲長江虛頭

市初集魚豆皆成椿夷獠不識人笑鬻蠃與麗綠荷竭苞  
直人散誰復撞鷗鳥亦來下酒旆停空杠我來憇桑門竹  
戶映蓬窓夜寢那可寐江流正淙淙

泛舟上湘口館

瀟水漫南來湘川趣東下二水始相會清豪不相藉山迴  
石瀨出木老修煙架泛泛白蘋洲林風媚如畫宿昔感騷  
墳幽興遙相借不謂垂老年孤窮羈山舍潮來刺舟去孤  
月臨清夜安得跨鯨魚不復人間化

石霜見吳誠上人

釋覺範

我尋流水行忽入霜華谷山陰見幽人自帶湖山綠語溫  
如春風韻秀自拔俗暗驚枯木堂樓此一枝玉遙知夜窓

洙雪響亂修竹室書掩殘缸佳眠正清熟逸想在西興清  
夢不容逐覺來念行處小詩欲收錄詩成寫烏絲銀鉤奪  
人目紫几着牙籤興來還自讀

書衣帛詩

氏嫁賈尚書子德祐時  
為元兵所俘赴水死

韓氏巴陵人

宋未有天下堅正臣禮秉開國百戰功每陣惟雄整及侍  
用幼主臣心常炯炯帝曰卿北伐山戎今有警死狗莫擊  
尾此行當繫頸即日辭陛下盡敵心欲逞陳橋忽兵變不  
得守箕穎禪讓法堯舜民物普安靜有國三百年仁義道  
馳騁未改祖宗法天胡肆大雋細思天地理中有幸不幸  
天果喪中原大似梨冠衽君誠不獨活臣實無愧丙失人  
焉得人垂戒嘗耿耿江南無謝安塞北有王猛所以戎馬

來飛渡以陵境大江限南北今此一舸艦本期固封疆誰  
謂如畫餅烈火燎昆岡不辯金玉礦妾本良家子性僻守  
孤梗嫁與尚書兒銜署紫蘭省直以才德合不棄宿瘤瘰  
初結合歡帶誓比日月晒鴛鴦會雙飛比目願常並豈期  
金石堅化作桑榆景旄頭勢正然蚩尤氣先屏不意風馬  
牛復及此燕郢一方遭刳虜六族死俄頃退鷁落迅風孤  
鸞弔空影簪強折白玉餅沉斷青纒一死空冥冥憂心長  
炳炳意堅志不移改邑不改井我本瑚璉器安肯作溺血  
志節匪轉石氣噎如吞鰓不作燭火燃願為死灰冷貪生  
念麴蛾乞憐蓋虎穿借此清江水葬我全首領皇天如有  
知定作血面請願竄化精衛填海使成嶺

練裙帶中詩

我質本瑚璉宗廟供蘋蘩一朝嬰禍難流落戎馬間寧嘗  
血刃死不作衽席完漢上有王猛江南無謝安長號赴洪  
流激烈摧心肝

元

赤松山

羅復元

昔聞張子房從此赤松遊藥竈蒼蘚合丹井寒蒲抽巍巍  
帝者師何事謀歸休咸陽歎黃犬爭如五湖舟知足故不  
辱知止故不憂擾擾道旁者駕言焉所求

瀟湘夜雨

陳孚

昭潭黑雲起橘洲風捲沙亂雨灑篷急驚陸櫓上鴉翻鼉

時出沒暗浪鳴櫓牙漁燈半明滅濕光穿蘆花

洞庭秋月

月明水無痕冷光炫清露微風一披拂金影散無數天地  
浩茫茫渚白獨有鷺鷥去月不搖一鏡湛如故

遠浦歸帆

日落牛羊歸渡頭動津鼓煙昏不見人隱隱數聲櫓水波  
忽驚搖大魚紛跳舞北風一何勁帆飛過南浦

平沙落鴈

十里黃晶熒菰蒲映原隰亂鴻爾何來影墜西風急唼嚙  
三數行欲起又飛立水寒夜無魚離離爪痕濕

煙寺晚鐘

山深不見寺藤陰連修竹忽聞踈鐘聲白雲滿空谷老僧  
汲水歸林露墜衣綠鐘殘寺門掩山鳥自爭宿

漁村夕照

雨來君山昏雨過湘水滿夕陽一縷紅醉眼草茵暖漁網  
晒石上腥風吹不斷野鳧沉更浮沙汀荻芽短

山市晴嵐

茅屋八九家小橋跨流水市上何所有寒蒲縛江鯉犬吠  
樵翁歸家家炊煙起共喜宿雨收霞明亂山紫

江天暮雪

長江捲六花汀洲白皓皓鴈影不復見千崖暮如曉漁翁  
寒欲歸不見巴陵道坐睡船自流雲裏一簑小



明

望南嶽

楊基

我從匡廬來但覺諸山低嗟峨望衡嶽雲霄與之齊下有  
赤虵蟄上有朱雀棲仰瞻祝融拔俯揖紫蓋迷五嶺皆培  
塿三江為洿蹄巍然南服尊嵩霍相提攜封秩崇君稱諸  
神咸朝濟丹書篆寶冊萬里封金泥百王重祀典赤纁藉  
玉圭自非精靈通牲帛勞焚賫予方向遠道無由陟層梯  
蒼蒼煙霞中嗉嗉聞天鷄緬思昌黎伯恭默開雲霓靈貺  
自昭格誠敬良可稽斯人久云沒感念徒含悽

望嶽麓

我為長沙客不醉長沙酒為愛嶽麓山繫舟城邊柳峯巒

一何秀膏沐春雨後蛾綠淨洗妝方知朱鉛醜所嗟山中  
寺頽圯想已久嶙峋北海碑千載獨不朽信為神靈惜長  
使山鬼守褰衣欲訪古日落辰在酉荒烟烏雀喧竹密虎  
兕吼老眼念後期未知重來否

湘女

湘水綠瀾瀾湘山碧峨峨空明影上下但覺禽鳥多我方  
任輕橈聽彼湘女歌湘女淡掃眉素頰垂兩螺幽蘭結短  
佩徐行拂青莎春風吹衣裙芳香動微波淑質自妍麗不  
待綺與羅真修慎所適窈窕山之阿盈盈青樓婦日暮將  
如何

題常執中無息齋

夏原吉

天道何剛健運行若機旋晝夜弗暫息今古或無愆四時  
以代謝萬物資陶甄嗟哉果何如惟其一誠焉不見古君  
子體道心拳拳賢兮則希聖聖兮則希天兢兢著謨典壘  
壘垂詩篇宣尼歎逝水孟氏稱源泉禹陰分寸惜陶甃朝  
昏遷銘錐季子讀圓枕温公眠所進雖各異所志同一堅  
睠彼蚩蚩氓相去霄壤懸靈臺既茫昧德基任摧顛高明  
邈難入汗下甘伏跽晚途或有悔疇能返流年吾湘常氏  
子學古知其然高齋匾無息翼翼臨江邊不華亦不溢非  
郭亦非厘軒窓貯經史几席羅毫箋端居究元牘終日惟  
乾乾德業遂精進聲華益昭宣徵書忽相迫試藝臨文淵  
琳瑯有餘響隙吹胡能聯英英冠多士籍籍應高銓暫別

東國友遠泛端溪船民事固雜沓夙心敢云諼朝焉戴星  
出夕焉戴星還吏案無留牘琴堂弗聞鞭一箠照清夜典  
籍還窮研匪日釣時譽所希在聖賢顧我何放曠百行無  
一全庸庸竊君祿華髮將垂肩感子名齋義自愧還自憐  
壯心日以鈍安能重磨鐫願子慎終始勿謂百里牽鵬搏  
必九萬驥騁須三千矧今聖明世簡拔無私偏坦蕩青雲  
路會當恣高騫周覽上林春滿把龍樓烟對揚吐奇蘊獻  
納摠忠虔躋民太和域致君唐虞前功名著青史耿耿千  
秋傳

題彭希益惜陰堂

星沙控荆湖屬邑十有二羅湘甲西北山水獨佳麗彭君

生其間鍾此山水異襟宇旣軒豁丰儀更清粹垂髫被庭  
訓詩禮日講肄諄諄期有成勉勉異無墜豈謂霜露嚴毒  
破椿木瘁彷徨痛遺業感慨先志乾乾仰居諸耿耿忘  
食寐構堂名惜陰予以自箴勵朝斯萬卷開夕爾一篝繼  
採搜聖賢心玩索古今事毫芒靡或遺纖悉必精至時當  
大比秋踟槐赴鄉試聲華動場屋文藻賁同類惟君自持  
謙不欲早干位春闈暫垂翮卒業辟雍地清修日益勤闡  
奧愈深詣嗟予素薄劣忝有鄉曲誼每瞻惜陰堂中心竊  
懷愧願言慎終始毋使虧一簣行當馭長風扶搖九天際  
宮花醉葡萄黃金耀名字遠追伊召心光輔堯舜治功成  
銘鼎彝芳譽永無替回視借陰堂煌煌孰能企

山雨晴嵐

薛瑄

雨來萬壑昏雨過千岫沐晴旭楚人家蛾眉畫生綠望翠  
如有情餘光遠相逐

洞庭秋月

西風淨晚烟天水遠相接瓊樓玉女深炯炯涵虛白夜久  
風露寒一鼓湘靈瑟

平沙落鴈

霜清秋水落風過人迹平飛飛隨陽鳥相呼下寒汀向夕  
聚儔侶月映蘆花明

煙寺晚鐘

夕照下山門清音出煙霧暝壑一僧還側佇尋歸路月上

楚天寒霜落洞庭樹

瀟湘夜雨

兩岸叢篁濕向夕波浪生孤燈借漁火江雨蓬背鳴南來  
北往客同聽不同情

江天暮雪

落落漁樵家蒼蒼起煙霧岸滑移釣舟沙平失歸路似有  
凌波人盈盈月中去

漁村夕照

釣艇收晚罾歸鴉集疎柳天風吹彤雲明月映江口孤村  
一笛橫萬慮復何有

遠浦歸帆

翩翩投極浦漠漠背殘照水柵歌竹枝清風激幽調歸舟  
漸覺稀錯莫尚凝眺

洞庭遇雨

孤舟行何遲歲晚洞庭雨跳波亂明珠隨風颺細縷雲霧  
失君山波浪連吳楚誰唱斑竹枝別思盈南浦

湘江舟中

湛湛湘水綠夾岸叢篁多挽舟逆水上南風起微波嘉此  
晴霄景迢遙觀江沱沙洲曠綿邈雲岫紛嵯峨遠目爲舒  
暢客意將如何濯纓吾所愛聊爲扣舷歌

懷湘曲

杰夢陽

湘筠寒翠滿白日起秋雲美人杳何處江氣長氤氳手持

紫玉管遙望青霞君藹藹波水暮何由致慇懃

湘妃怨

采蘭湘北址攀木澧南潯淥水含瑤彩微風託玉音雲起  
蒼梧夕日落洞庭陰不知篁竹苦惟見淚斑斑

涉湘于邁嶽麓是尊仰止先哲因懷友生麗澤興感

伐木寄言

王守仁

客行長沙道山川鬱綢繆西探指嶽麓凌晨渡湘流踰岡  
復陟巘弔古還尋幽林壑有餘采昔賢此藏修我來實仰  
止匪伊事盤遊衡雲間曉望洞野浮春洲懷我二三友伐  
木增離憂何當此來聚道誼日相求

朱張祠書懷示同遊

林間憩白石好風一時來春陽熙百物欣然得予懷緬思  
兩夫子此時相徘徊當年靡童冠曠代登崇階高情詎今  
昔物色遺吾儕顧謂二三子取瑟為我譜我彈爾為歌爾  
舞我與偕吾道有至樂富貴真浮埃若是成大化勿愧點  
與回

又

陟岡採松栢將以貽所思勿翦松栢枝兩賢昔所依緣峯  
踐石臺將以望所期勿踐臺上石兩賢昔所躋兩賢去邈  
矣我有何相違吾所未能信役役空爾疲胡不比簪盍麗  
澤相遊嬉渴飲松下泉饑餐石上芝偃仰絕余念遷客難  
久藉洞庭春浪瀾浮雲隔九疑江洲滿芳草目極令人悲

已矣從此去奚必茲山爲戀繫乃從欲客土唯隨時晚聞  
異有得此外吾何知

天心湖卽事

掛席下長沙瞬息百餘里舟人共揚眉予獨憂其駛日暮  
入沅江抵石舟果圯補敝詰朝發衝風遂齟齬暝泊後江  
湖蕭條傍層壘月黑波濤驚蛟鼉互暉晚翼午風益厲狼  
狽收斷汜天心數里間三日但遙指甚雨迅雷電作勢殊  
未已溟溟雲霧中四望渺涯涘篙槳不得施下夫盡嗟噫  
淋漓念同胞吾寧忍暴使餽粥且傾橐甘苦吾與爾衆意  
在涉濟絕糧亦均死馮陵向高浪吾亦詎容止虎怒安可  
撓志同稍是倚且令並岸行試步湖濱止收舵幸無事風

雨亦浸弛逡巡緣江涓迤邐就風勢新漲翼回湍倏忽游  
如矢夜入武陽江漁村穩堪艤糴而謀晚炊且爲衆人喜  
江醪信漓濁聊復盈胸痞濟陰在需時微倖豈常理爾輩  
勿輕生忽然非可恃

出郭遊靈巖山

張治  
茶陵人

曉出城南門霧深暗江渡稍稍曙光開微茫見蒼樹驅車  
村巷中野老偶相遇問予何所之笑指白雲處

夜過洞庭

曉發吳昌門夕渡黃陵址日暮江帆遲洞庭三百里微風  
澹無彼明月照天水隱隱見君山鐘聲翠雲裏樓船坐中  
流長歌白波起

讀書巖

昔人讀書處人去巖亦空巖  
上古松枝白日含悲風磨崖  
幾片石剝落苔蘚中獨有山  
間月清光今古同

靈巖

岩窈入丹壑石室閉羣峯  
壁色照萬古雲霧流其中  
山僧傍巖宿下馬聞疎鐘  
欲訪仙人跡雲車駕白虹

出靈巖山

貪奇事攀躋邱壑自成趣  
鐘聲滿寒松日落萬峯暮  
流泉不出山歸雲還依樹  
雲水喜相招遊人獨歸去

靈巖山夜歸

新月掛西嶺千峯流素輝  
歸屐踏秋草白露沾寒衣  
平村

八九里籬落人跡稀  
長歌渡江水曲盡天風微

經仙人橋

鄒守益

假道獻花巖周覽仙人橋  
六丁揮霹靂羣虹駕岩堯  
老仙垂長隱裊動若相招  
怪石摧丹篆靈澗寫雲韶  
年來歷名嶽世味漸能銷  
猶有一瓢水欲濟同室  
煊才力不逮志恐為世所囂  
終當結草廬赤脚踏瓊瑤

步石鼓書院壁間文公韻

宇宙一逆旅驅車慎無左  
鸞鳳乃膾炙豺狼或笑唾  
卓矣卧龍翁抱膝睨王佐  
向非魚水歡積玉豈易賀  
督餉出三湘雲鳥時一過  
炎德雖未恢忠貞詎肯挫  
後來子韓子古調亦寡和  
赤幟排佛老魏晉能幾箇  
山陽與海潮百折甘

坎珂廓清評武事老羅當道卧南渡得朱張絕學最上課  
 元氣天所培偽禁理則那太極剖南山賁育鼓羣儒譬彼  
 百畝菑憫憫勤種播豈無來年積拯此洛水餓艾齒始岳  
 遊逢奇輒自賀懷古追千里中道敢云情邦君時虛席羣  
 彥燦盈坐九合器猶小千駟夢已破稽首江漢瑛皜皜安  
 可泥

寓武陵詩

何景明

武陵一何長遼遠不可測高林多悲風慘澹日無色黃熊  
 啼我前白狐跳我側蛟螭蟠深淵不見奔雲黑沙蒸水亦  
 毒我僕飢且踣辭家忽踰秋適此萬里國土風日以殊川  
 域邈無極伏波有遺響吟餘轉悽惻何因托橫吹一寫千

載臆

桃花源

神宮矗飛觀結構倚層邱上翳萬年樹下映千尺流仙蹤  
 久已没百代傳其由荒塗橫白雲寥寥安可求

虎跑泉

李攀龍

大士始結搆鑿空偏此邱二虎自南岳掉尾從師遊神威  
 攫地脉佛力驅陽侯枯火迸石罅松根結綢繆勢寧決籓  
 去揮錫怒不休至今噴巖壑水猶咆哮流酌言生壯心一  
 嘯風颼颼海眼在其下潮汐故可求不然胡僧咒爭使波  
 瀾浮穿壁吐長澗夾寺瀦龍湫疑作故山雨片雲駐岫嶺  
 歸應出東林無爲惠遠留



贈武岡丞周嗣昌時以考功法坐浮薄謫三首

王世禎

長安旭日動輪鞅錯中達飄蓋青雲端徒御亦光輝朝遊  
平津邸夕讌曲陽池為快非一狀志士鮮不比窮巷春風  
來往往與醉期一聞預汰議襪被省中歸微晒向時人茲  
險胡不夷

蒼蒼千秋色沉沉何時旦一與王生遊遂為浮薄冠尊酒  
關他人詩書同茲難尋形笑嵇阮傳聲亦絳灌雖隣長沙  
謫尚遠交州竄拂拭瑤琴徽為君再三歎

予昔遊荆門守相效前驅山川來笑人手板今與俱萬事  
相低昂吾道竟焉殊峽雪寒自堅巫雲暮還舒雖有千金

藥狂病勿令除王生在東海東海亦吾廬

南嶽廟

尹 臺

疇昔抱微尚五嶽志窺尋限身清切禁安得諧夙心恭承  
帝嘉命羣籓展圭琛炎方鬯歷討因獲散冲襟遂越三湘  
浦亦涉衡陽海駕言謁靈后清齋秉嚴忱霾陰豁幽巘朝  
景耀陽林長松三十里夾澗擗疎森微風下曲崦蕭風竿  
籟吟危闕聳霄漢朱碧微霏陰羣風儷翔會紫翠紛升沉  
聖人握元化峙流序高深皇皇朱鳥祀秩禮崇古今惟德  
理南訛長養專調斟再拜盼庭廡肅穆懷居歆

祝融峯

湛若水

我年儕八十強半懷衡山於茲愜所願誰能不為歡霧行

衣袂濕雲卧衾枕寒清高鳥籟寂神明中夜存一聲聞天  
鷄紅日躍海門

泊故城與戴侍御謝寶慶夜酌喜而有作

李東陽

逆流衝長風岸渚成百折舟行落日暝篙櫓力已竭同袍  
烏臺彥待我心切切結交重然諾此道久已絕偶逢賢太  
守論舊語不輟烏臺冰霜姿官好不自熱周旋共觴酌燕  
坐齒爲列相顧問起居停杯聽予說自從違京邑道路屢  
危艱歎帆若撐駛長纜阻牽掣復聞南河水淤淺不可轍  
黃沙捲驚塵千里地欲裂雨師何太懶風伯無乃褻我舟  
未妨遲農事長苦舛懷著問蒼天心亂不可揅二公濟世  
者慷慨憂不歇我我南州蓋矯矯中臺節方將承明威庶  
用掃氛孽許國同肝腸匡時仗豪傑閉官媿升斗茲計予  
已拙且復盡君觴倉皇慰離別

送寶慶謝太守省

湘水天下碧衡山千古靈我侯東南來攬高濯其清此地  
旣佳麗斯人亦豪英五馬豈不貴棄之一羽輕茲謀旣不  
遂所志豈在名湖南近凋瘵歎息爲蒼生近聞都臺牒列  
縣河巡行贈若衡湘篇匪爲遊冶情

寄題謝寶慶逸老堂得乞字

穹形天地間俯仰孰非物復爲物所累轆軋何終訖君昔  
守湖南馳驅奉綸綍晨興必薄訟夜坐猶佩鞞民憂與國

計我抱行鬱鬱居愁嵐霧蒸路駭江飈疾秋霜復春露歲  
月何太倏遙憐使華返歸念朝衣拂孤桐載還經五柳栽  
始苑天台峻宜登滄海青可被鐘阜休移文鑑湖安用乞  
逸驥方脫銜冥鴻不受尉天時遞推代物理有伸屈達人  
諒宜然吾道豈云第行藏二十載夢覺徒髣髴萬事付三  
緘高談不如吃心閑力愈健百疾謝攻熨曠懷浩無涯勁  
氣老猶仡思君遠莫邁佇彼高風屹起望石城霞文光正  
輝蔚

湘潭遊宴

譚元春

空湘待春雨薄旭照湘潭卜築聚風騷魚鳥入高門堂幽  
宜晚坐舟事沿芳蓀欲知所歷妙信棹覓溪村柳絮點濁  
醪野香行岸根小灣水夜長前者渴平原勿謂湖嶽遠厥  
勢如吐吞一醉古人到重遊安可論

遊嶽麓寄伯敬先生

去嶽日已遠茲麓存典型水陸分中江延目洲外汀嶽意  
無斷續草木森情形林杪蓄新泉溝洫聲泠泠拜石修竹  
旁祝融開遠青是日寄公書南風下洞庭

謁南嶽晦庵南軒祠柬諸同志

張居正

兩賢異鄉域千里還相求祇爲戀徒侶能忘路阻修我行  
躡以仰見祠屋幽高山近可仰嘉會亦綢繆俛首念疇  
昔懷殷憂雖抱遺俗心賦質暗且柔曩負喬嶽有  
志適願我同心侶景行希令猷涓流滙滄海一簣成

山邱欲騁萬里途中道安可留各勉自新志母貽白首羞  
祝融峯

祝融羣峯表嶽率萬古雄采虹掛丹壁邈若升蒼穹舉手  
捫太微天關洞開通璀璨南斗星垂珠當我曾俯瞰六合  
內洗滌烟雲重浩如太始初二氣涵冲融湏臾湧陽景倒  
挂扶桑東瀛海不復辨三山安可窮寄謝冷風子吾將遊  
混濛

衡山道中

江南佳麗地靈境信隈隩連峯造天關石笋挿雲足我前  
擁烟霞我後映松竹飛竇洗征衣山光盪人目朝採碧澗  
藻夕息清湘曲側想素心人浩歌渺空谷逸駕如可從吾

當謝簪紱

五雷池

楊繼善

雲陽古南嶽衡湘氣節宜誰鑿三湘水滙作五雷淵其源  
湧萬斛其流瀉百川擬作匡廬瀑滌洞勝飛賤我來秋冬  
際雷藏泉愈鮮迴風吹古殿漾日照枯禪更喜山厨近井  
竈一泓連池南浮谷霧池北泛厨烟夜半鐘聲度寄響殷  
峯巔

龍洞

湘陰知縣揭士奇

大造搏堅濡流沫化金石誰持萬鈞斧將此形勝勞疊玉  
削芙蓉瓣瓣工雕劃森巖若老將武庫富劍戟織穠美女  
姿環珮都姣嬈萬木轟危巔葱菁拂雲碧舒徐歷衆妙緜

徇自幽適上疑摩青空下可坐百客伏虎踞中庭飛龍挂  
東壁下有冷冷泉清流歛闐澹從此入二洞眠牛橫亘隔  
攀躋無難踰而有旁可陟陟磴縱步寬穿曠覺身窄湏臾  
別一天黶黶費撫拍羣呼迅藝炬峻帽更焜赫中展方鄴  
局云是神仙奕三洞倏已啓左右分兩隙左出天堂山飛  
仙此奮翮其右通垣達一竅透靈脉入窓總玲瓏四壁嵌  
琥珀石窠巢蟄燕深窵走狡颺風從何方生露若自空瀉  
坐久懽心神當暑寒生腋玉骨沁冰壺齊紈怯楚谿導者  
忘來蹤信足失順逆長笑旋已驚恐茲動雷霹出壑詢田  
夫洞名無能譯宇宙故茫茫遊者亦藉藉嗟此殊絕觀知  
音竟難索我來爲元元偶爾獲靈跡山川豈相待匪也獨

躑躅袍笏拜丈人任彼言者摘斜日促歸鞭何時重著屐

登河洑山

袁宏道

高閣俯蒼崖下有桃源路料得避秦人入山從此去潭水  
浣山屑屑盡紅霞露老蛟挾瘦石千古盤渦怒溪上盡漁  
郎誰識花流處事在白雲新人去青山故挂卻茱萸囊長  
嘯倚丹樹

兜率菴次壁間韻

王京

衡山白天落名勝真竒絕竭來恣幽賞相對忘言說天未  
起悲風商氣應秋節林鴉散夕陽藤蘿挂新月蒼梧渺何  
許湘靈鼓瑤瑟策杖叩禪扉柴荆蒙以密慧燈照蒲團炯  
炯常不滅囚之談哀慄聊以慰岑寂千古斯人心宇宙同

空濶舜蹠毫釐間所貴在區別

流杯池

衡山彭簪知縣

吏事苦煩鬱索遊謝吾黨乘興出郭門四顧增慨慷荒亭  
久寂寥衢路成榛莽緩步陟崇岡高歌振林響桃李笑無  
言春光正駘蕩飛瀑噴玉屑跂石擎仙掌分泉入曲池流  
杯恣清賞雜談忘爾汝一點動遐想斯湏非久計暫覺脫  
塵鞅憂樂古人心勗哉憑俯仰

杯湖尋元次山宅

王錫爵

蕭舸下湘渚巉石當其崖清川帶烟霞碧岑遠塵埃廻岡  
秀林木觸處崇亭臺昔聞漫郎氏卜築溪山隈風月滿戶  
牖吟弄集朋儕釣石隱磻溪梧琴調徂徠斯人不可作高

標遺九垓崑崙十丈碑千古無蒼苔我行滯江臯鬱抱終  
以開徘徊且登眺白雲入我懷寄語賞心客朋年還復來

觀音巖

邊維垣

吾意僻烟霞乘閒覓巖谷山中無世情永日清耳目芝朮  
自香芳青鸞與元鹿白雲晚不收片片挂高木皓月上東  
林次寥天穆穆纖埃無處生萬壑寒光肅翻歎塵俗客韶  
華傷局促徘徊夜色闌就此石梁宿

觀音巖次韻

郭崇嗣

楚山多白雲悠悠起巖谷憑虛聊一觀變態驚我目恍惚  
烟靄中仙人馭白鹿幽壑瑤草芳古洞多奇木忽聞仙樂  
鳴鈞天音穆穆樓高天宇近夜薄寒威肅勝遊難久留飛

蓋來朝促把酒一高歌毋復雲林宿

懷呂黎文公

湖廣副使管大勳

聖賢久不作叔世崇佛老倬彼昌黎子力排著原道摛文  
振頽靡抗節秉孤矯寥寥百千年煌煌元和表寧逃至尊  
怒頓為迷俗惝慷慨辭金門赴謫潮陽島行行過南嶽陰  
雲為誰掃逆旅寄交歡閒亭垂麗藻貞珉固不磨山斗以  
為寶

祝融絕頂

巖岬本秀特扳躋益峻巖峯頭懸翼軫壑底蟠蛟螭松巖  
削青蓮石澗流綠漪赤玉蘊重岡紅花散四垂香風起天  
末萬籟當空吹頓令六尺軀飄飄欲何之洞庭盈一掬蒼

烟失九疑靈異杳焉對浩渺渾無涯漫遊舒清襟兼得  
元奇倦來卧白石此將餐紫芝冥心戀景光延佇復多時  
囂塵自茲隔動靜還有期終歸南山隱勞勞竟何為

懷晦菴先生

吾道在南州考亭宗尼父正教衍淳熙名言記石鼓崇臺  
幾廢興豐碑麗今古國步值艱難世俗多龔瞽獨以生平  
學抗論悟人王立朝蹟已危乞祠心獨苦白鹿垂芳規嶽  
麓存聖矩至今蒸湘間猶然等鄒魯

懷南軒先生

人心皆孔顏湛寂元無滓利義分毫茫誰能斷其旨緬仰  
懷先民蚤歲悟至理卓卓趨高明仡仡事踐履承家願不

違許國死後已所以宋諸儒雅推南軒氏足蹟遍潭沔師  
父契蘭芷勝遊霽岳雪涉趣詠沂水試讀武侯碑令人空  
仰止

石鼓書院懷諸葛武侯

絕代有卧龍長嘯南陽曲生丁炎運微羣雄紛角逐三顧  
識帝自權如魚水浴督餉鎮臨蒸經畧始南分荆荆吳  
魏興劉定巴蜀義旗颺祁山賊臣膽先戮傷哉伊呂儔于  
業竟鼎足兩表出師心千古仰芳躅

贈祁陽孝子盧伯子

有序

屠隆

余友人德玉盧伯子天性真醇孝友純摯父婢舉  
一弟而婢沒伯子捐其弟出入卧起若形影相隨

稚長口授以書爲之句讀講說夜則篝燈對讀晝  
間寒暑伯子業舉於鄉頗交海內才彥士一日客  
至留酌淹延三朝頗廢少弟講課其父怒召伯子  
撻之流血伯子怡然受之旣而私念平居所以捐  
弟者良厚以賓客故暫輒講亦無大過父疇昔未  
嘗有此恐發而悔悔則卧不帖席矣夜半往省父  
卧所低聲呼之父果未寐問爾來何爲者伯子答  
所以父遂大感慟持伯子泣嗟乎爲人子無故而  
受父撻至流血怡然不怨而顧又慮父悔悔而夜  
卧不寧也夜分往而省候焉其用情豈在曾閔祥  
覽下哉余父見背三十年母年高九十有七時以



好遊定省常缺余其天壤間一大罪人乎陳孟惺使君與余言而為之感泣遂有此作

賢哉盧伯子孝友敦天倫總中挺奇秀醇德含清真事親隆色養至性高古人父婢育少弟英英照瓊玖蘭夢既有徵棣鄂一何茂弟舉婢乃亡孳孳日在疚伯也愛彌周撫之若同母數共姜肱被出入相左右稍長親授書文行深棧樵妙理無不譚疑義悉與剖永夜同篝燈昆弟為師友尊君有義方庭訓日嚴切客至訪伯子洄酌以時設留連經三朝講課為暫輟父也嗃嗃怒撻之至流血有弟廢不教沉酣事麴蘖伯時舉賢書海內推才喆受而何敢辭辭色轉怡悅既乃內自省拊弟頗無缺罪輕而責重父悔恐

不寧無乃妨夜卧子心良屏營窻分往省候下氣復子父果不成寐展轉倚床程問伯何為爾伯也道其情父子遂感愴相對涕淚零孝子受杖輕乃泣親衰暮伯今不怨親反慮妨夜卧為子洵如此古人豈能過

光霽亭

蘇茂相

宋學稱理窟濂溪挾其闕根極主靜言昭晰太極義中懷謝麟滄外象挹和粹霽月映光風夷然豁滯憑程子深服膺趙公竟臭味侯生侍三日識者遠驚異千載想靈襟令人猶融泄明牧挹道淵典型勤寤寐祠宇煥舊顏庭草滋新翠簿領此何須絃歌古所貴

遊月巖

徐愛

攀奇殊未厭澗谷披蓊莽搜崖陟穹洞中秋孤魄朗消長  
隨朔晦東西窺偃仰分明示太極陰陽始析兩哲人固先  
天肇物亦有象字畫魚鳥因圖書龜馬倣元公自探易證  
茲彌不罔可以春陵墟仰配河洛壤

遊月巖

許宗魯

緩轡春陵西逡巡濂溪渡翼趨茂叔堂宛挹光風趣爰披  
太極圖誰授先天數咄彼青蒼崖峻岫風雨如中涵一竅  
靈至寶神可護如缺復如盈寒光瑩繚素是鑿混沌精乾  
坤此陶鑄炯炯洞中天冥與哲人悟俯仰遊太虛徘徊起  
遐慕對茲月巖奇幸有德星聚雲岑掛夕陽好鳥鳴高樹  
安得魯陽戈一揮使日駐遲遲詠歌歸漫踏蒼苔路

欽山漁仙洞尋龍君御所

鍾惺

楚人事黔役能無山水情所得乃在楚特以黔爲名如彼  
蜀三峽其險半于荆陸行問桃源靈輿寄水程所以起辰  
州三日聊舟行穿石望而足水心恨未停晚泊欽山下獲  
與幽願并靜者領斯山意匠妙經營搜抉畢智勇虎穴不  
得寧頗負康樂才要與陵谷爭靈怪爲之遜吏民乃不驚  
停舟山雨內舟停山亦晴棧榻與巖巒左右烟中生屈曲  
行螺中子所謂甕城如何有宋刻筆體老而清可見虎穴  
先禪者之戶庭古來幽奇地人獸俱相更冥心觀去住鳩  
鷲開其明

坐嘯亭

衡州知府蔡汝楠

朝天復還郡坐嘯巖亭月雙榴綴穠華新荷散幽列景物  
如見待柯葉不改色棲鳥時一鳴遊鯨復堪悅動植陶嘉  
運里間詎安戢翻因賞心會興念匝九邑亦知勞跂望撫  
綏愧微力歡遊勿太康勉思藩牧職幸閱齊民要庶與同  
休息

結茅大雲山麓懷仙三首

鄒統魯 衡陽人

中宵蟲語靜翻然思海山安期間有約盧敖何日還陋彼  
秦王才金壁空斑爛至今阜鄉裏委影在白菅猶昔遺玉  
鳥狼藉履戎間何如王次仲冥冥不可攀泰華松千尺抗  
聲帶鶴閉長江一片月水寂雲潺潺

黃虞遠安適伊呂良管庫豈為墨灰中能著葛雨屨鼓角

起陰風薄蝕變旦暮白雲指帝鄉清埃愜懽素仙尉棄青  
組散髮投江路華陽解金籠吹笙卧松霧火生不用光土  
窟自忘怒漠漠落翮山力政焉敢顧

梧桂哀白露蘭芷惜春暉姑射有瑤草蓐收不能腓下有  
雲母蟠上有玉液霏籍籍水土中羣類鼃蠃衣生死渾無  
間出入盜一機壤蟲笑黃鵠坐待塵成圍

答衡嶽隱者

長沙司理 蔡道憲

蹴碎嶽麓雲剪斷湘江水楓丹染院深高飄菊衣紫竹露  
垂朱霞霜華拂劍齒聞君多苦心中夜嘗數起敲火作長  
吟山鬼驚偷耳持寄素心人虹捲吳縑裏蚤暮欲行尋相  
將索奇字

湘上行懷林雨若

宿霧卷大山浩然滄海色中有無數峯奔騰不可得我欲  
登我眉披雲幾千尺下指望林臯烟點梅花白踟躕念天  
寒尚疎遠行策昨日鷓鴣裘已贈思歸客

贈黃花驛觀湘序

朱士林

湘水清可觀新亭翼弘厥面江瞰空濶據地爲高爽遠樹  
雜烟靄斷崖連篠蕩鴈影隨微茫漁歌答清響三閭不可  
弔蘆佩空想像二女時出遊翠蓋移惚恍繫予頗好古到  
處寄幽賞佇目更如何澄波滌塵鞅

割肝吟爲彭孝子作

郭都賢益陽人

割股以行孝經史曷嘗記咄咄一老彭怪哉割肝事解衣

肺尚懸使我不敢視因言十九齡爲父斷右臂活父復十  
年賴此寸鬻致報母奉長齋至誠本無僞一病將不起心  
力爲憔悴默禱誓捨身有神通假寐汝肯割肺肝汝母度  
痊治神語亦杳茫予懷猛決志先割左股肉痛定直容易  
疾聲呼慈悲當心忍一截肺肝何處尋幸爾忽進出自分  
不復生膾之當藥餌母愈子亦全終始慈悲賜我聞之駭  
然性命等兒戲髮膚或毀傷肝腦輕塗地萬一死其軀翻  
爲孝行累昔在宣宗朝有女曰衛擊割肝醫母病奏聞寢  
其議孝道本中庸愚民防好異我思又不爾捨生原取義  
當其起念時七尺已捐棄若恐惑愚民人於此偏智人人  
一片肝問誰肯再試

舟行望南嶽

錢邦芭

輕舟邈湘波回轉經幾折天末浮雲收澹蕩風日潔循流  
肆娛玩極目飛鴻滅了了見前峯高下自成列三五劍鋒  
尖作勢每奇絕舟行多紆迴顧望忽遷別橫側狀不齊變  
幻難具說高霞冠層巔白雲橫帶玦芙蓉千葉花玉屏幾  
圍雪名勝自千秋幽勝何敢褻遙瞻已厭心况復停遊轍  
登陟雖可期轉覺心如結山靈若有知待我應情切烟霞  
癖在茲非欲鳴高節寥寥山水間誰復契明喆

同語嵩登衡山燕子崖

空岸無人聲飛流濺危石靜久欲忘言精神自相逆松蘿  
高下垂猿猱時跳躑夕陽下空潭倒映千山赤老樹飲新  
霜丹黃凝絕壁白雲冉冉來欲就山中客氤氳修竹間  
我分半席淡漠若可依山風復驅迫搖曳凌前溪彌望蒼  
茫碧安得共吾儕一笑混心跡

忠毅劉公祀事詩

有序

陶汝鼎

寧鄉人

癸未九月獻賊破湖南楚按君劉公熙祚仗節不  
屈執之至吾邑之道林士民謀奮螳臂相奪賊怒  
大屠寧殲公而去爾時全楚大吏以抗賊聞者獨  
蔡可李與公兩人耳今既數年長公蕃錫來修祀  
事寧故燼餘又重苦賦役無生氣然談侍御公之  
遺烈未有不鬚眉張而涕沾膺者也予逋廢山中  
辱長公貽以史乘讀之悲肅感觸舊懷聞邑大夫

議更奉主入佛廟 龔貧衲也管寧絮帽方慙易水  
之衣冠徐穉生芻尙欠南州之鷄酒漫附里言用  
當楚些云爾

忠臣社稷衛正氣天地倚國步既艱難彌留仗斯理傷心  
烈廟中鯨縱網迺弛節鉞爲之驅堯熬久無壘赤巖走瀟  
湘膽寒劉直指劉公忠孝人古之真御史督戰九疑山氣  
欲吞賊子怪哉風雨橫夜靜朱陵圯繡衣就檻車半壁鼓  
聲死瞠目下長沙意在汨羅水芳冽小瀉江波濤爲公起  
奪公事不成成仁亦繇此慷慨嚴顏頭怒切睢陽齒節義  
感草茅精魂瘞蘭芷常山有令嗣膚髮終歸里公言振末  
流謚爵彰貞軌千秋屈原廟照耀潭城裏我嘗拜公祠浩

衣薦湘蕊今日讀遺編秋霜聲滿紙毘陵望廬陵悲歌正  
遙擬三光倘不淪百世興頑鄙髮髯嶽雲間森寒來劍履  
本朝

進帆石門懷古

陳恭尹

春至景漸暄舟行日堪翫矧抱昔人心而懷斯世歎平坡  
互倚伏今古如宵旦石門雖宿遊風物亦殊觀積峽啓奔  
流平沙衍高岸帆迴斷颺急櫂去餘萍散融融出濬雲役  
役將歸鴈卷舒寧自期寒暑爲誰損浮生貴不朽金石有  
銷爛仰羨樓船人英聲烜西漢

正月二日奉陪諸同學登赤寶山種花

向文煥

春晴纔二日春草欲半肥天氣有餘佳東風拂我衣共君  
 陟高山種花向翠微山靈發奇情窈窕增光輝花史課勞  
 逸花奴計密稀高低隨勢分曲折緣隈碕百花忻有託未  
 開已蕤葳獨羨山中梅清香時馡馡絕頂坐超越披襟數  
 芳菲遠山開疊嶂殘雪光澹澹回顧眾壑寒下視冥鳥飛  
 隨意過藤蘿烟嵐如可依飲我花間酒對此林樾暉冉冉  
 春江渡共抱香雲歸

同歐陽晉侯登龍潭馬鞍山

馬世俊

我出于重巖來登千頃石盪胷吳地濶遥睇楚天碧濕雲  
 開晚照隔岸山盡赤漁網集斷浦鳥道盤絕壁明流靜如  
 鏡呼朋掛遠席洲草雨芸芸嶺葉風滅滅俯仰興有餘息

心謝物役

夜遊嶽麓寺

趙開心

長

日夕羣峯暝負策臨崔巍青谿意已遠况復月空微山  
 聞谷口烟鳥無驚飛粲粲寒苔壁松蘿引薄衣篁筵入幽  
 邃危泉護巖扉霜色滿前路行行漸忘歸

登隱山

嚴元烈

跨馬出城隈隱山忽在目遙水漾朝敷迤邐迷磴曲山根  
 亂石橫龍窟邈川麓蒼松勢蚪蟠飛禽鳴灌木窈窕得茅  
 茨老僧隱深屋下馬坐高岡四顧清陰覆俛首瞰長林蒼  
 莽極遥矚桃李媚幽谿烟臯新布綠和風上短衣拂拂來  
 芳郁頓令塵慮消便覺素懷足何用慕丹邱采真枉僕僕

徘徊忍輕遺長嘯振巖谷

合江亭次昌黎韻示石鼓書院諸生

湖南  
巡撫 潘宗洛

危亭倚朱陵湘流納烝左千古傳絕唱綠淨不可唾我思  
貞元朝嶽峯中興佐胡為竄炎荒遷逐隨賈貨廟廊心事  
違此地高軒過吟咏何激昂泉石為頓挫南軒書其詩拱  
手未敢和後人好題名刻竹逾萬箇極目俯浩淼攀蘿歷  
坎珂帆檣落風湍衣裳冷雲卧步武陵滄洲流沫媿清課  
泰山誠難撼棄甲奔則那嗟哉昌黎公名節勵頑懦詩篇  
特餘事到處獲揚播石鼓諸書生志勿患窮餓誰當為張  
籍誰當為李賀焚膏以繼晷學業荒於惰不見七賢祠首

列公高座陶陶忽悲秋皎皎亦易破學韓期如韓拂拭韓  
碑澗

長沙秋日送吳介石明府赴廣陵兼寄吳興太守

宋 俊

夙昔若會稽航竒搜禹穴金芝隱石帆靈雲不可揭比來  
渡瀟湘日與幽人接振策岫巒磨崖歎竒絕偉哉龍蛇  
形蒼木互蟠結我聞珮無支洪濤怒超越為作禹碑歌與  
君資利涉洞庭波若山廣陵濤似雪采采芙蓉花還與秋  
蘭折秋蘭不自香懷抱共誰說荆土訪詞英寄語相思切  
湘潭紅豆歌已作經年別木葉下江皋吾亦營雙楫豈必  
懷故都客路多騷屑



秋夜同金大年宋長白宿樂有園

游 乾

芙蓉弄江光秋意渺難極靜卧贊公房晨鐘起行役披衣  
步庭隅階萸露滴瀝流水澹無聲峯雲牕幻碧吳會多崎  
人浮湘盪胸臆寧辭車馬喧卜築熊湘側茅庵顏樂有清  
燈掛囊錫作記擲金聲江山助筆墨趺坐妙香來一室烟  
霞逼慚予羈旅人暫此招提宿

梅橋

總 陳鵬年 湘潭人

白處多辛夷紅處多櫻桃荒村二月初繁華麗青郊石梁  
架水碓厥聲何嘈嘈林鶯時一啣田風渡溪橋隔隴見人  
烟聚族分漁樵固非桃花源外物乃不交澹然愜孤往悠  
悠息塵勞草茵鮮留客欹坐凌東臯乍見林間人村子爲  
奔逃安得似田舍入門尋濁醪

隱山

八春始十日早寒猶在衣策馬隱山道雲樹何霏微空林  
積宿雨晏日漏餘暉巖煙出不定往來半山飛氣噴夜鳥  
怯路僻行人稀幽尋自茲去老僧同采薇

買舟由涓水入嶽

我住南山下口見南山色南山刺天青相望失咫尺忽忽  
三十年始爲獨往客買舟涓江水榜人戒明發渴日正曛  
隴八舟祗煩熱驀見千丈雲心神乃飛越巖烟變嗔喜靈  
態互出沒遐想短壑松下有太始馬遲我踏層水跌坐雙  
脚赤

嶽麓

張鳴珂寧鄉人

嶽麓氣象尊隔水抱湘郭上貫長沙星精光互磅礴祝融  
 駕火龍蜿蜒間雄卓奔騰不得住到此成磊落就吞湘江  
 水少潤赤帝渴諸山盡趨承羅拜崩厥角降神毓靈秀代  
 有偉人作萬松簪其巔濤聲振寥郭烟雲足下生平蕪何  
 漠漠膚寸雷雨奮膏澤無不沃當年鄒道鄉扁舟不得泊  
 子夜列干炬一宿如踐約此山愛忠信玄隱未敢托尤尊  
 有道八山靈聽講學朱張兩夫子壁立伴五嶽與此氣和  
 合卑陋盡揮霍超然性命宗老佛為氣奪所以英華萃瑜  
 瑾相追琢麓峯實多助誰敢拳石度我來頻仰止飲泉紉  
 杜若振衣千仞峯揮手謝羈勒呼吸通蔚藍頓覺心胸豁

搔首問青天一嘯羣峯諾

百泉軒

曹耀珩

朱洞興文學書堂為肇始千秋續正脉卓哉兩夫子元公  
 產營道光霽無渣滓二程從之遊與點展然喜考亭接淵  
 源靜觀得精理伊惟南軒子而素去糠粃身侍紫巖公流  
 寓屈賈里城南闢院宇五峯正學邇二賢合並時晝夜論  
 不已豁然心理同太極會其旨每渡文津西赫曦共徙倚  
 泉竇白鶴來涓涓無歇止蘭澗石瀨俱漪漣清見底百道  
 盡潺湲瀉入亭臺裏爰搆百泉軒軒楹看沼沚高峽敞清  
 風層雲膚寸起花晨並月夕吟賞必於此敬夫既主席眾  
 英奉杖履紫陽未幾時潭州官刺史嘉蹟不勝書文教尤

增美治事之休暇輒擁皋比凡考德而問業講貫未停晷  
州郡于于至上舍一千士繹絡車騎紛馬飲渴池水乾道  
咸平間譽髦少倫儼人傳洙泗風吾道今南矣憶昔晉魏  
降儒術傷卑靡雕繪在語言問學徒口耳二賢宗濂洛性  
天爲根柢雅懷誘後進湖南擷蘭芷斯文遂在茲末俗狂  
瀾砥薄劣厠河汾景行緬芳軌昔時遊賞地莽蒼生荆杞  
逶迤逝泉流嘯咏空爾爾悠悠百世下誰踵朱張趾

湘樓春雨紀懷

石 嶙

山開萬籟春細雨凝江閣風落水漣漪清影抱城郭羣花  
漏英姿白雲戀幽壑故園時自華恬淡亦孤託魚鳥覺親  
人才思愧伊洛壯士不受憐與世相厚薄十年如石心風

塵蔽書橐

湘江秋月夜分韻得影字

左 史

對月泊平沙月明舟亦靜洞庭氣常肅不秋意先凜况復  
月露深此際生微省暮烟起野汀迥然上層嶺不知何寺  
鐘悠悠度松影初鴈甚分明聲光忽遠隱水月淨秋容是  
誰得孤領

遊浮邱山

潘序賢

入山山漸幽迥覺遠塵境披蕙尋羊腸分蘿望雲嶺青鋪  
蔭壑松丹瀉掛巖杏麝眠香氣生虎過風威猛憑高天地  
濶絕處衣裳冷怪石裏老藤蒼猿嘯殘景曛日射林麓鮮  
霞自炳炳徘徊俯大荒渺渺懷深省緬思空峒子常羨延

壽井飽餐靈瑞芝竊駕鹿鶴騁虛無惜羣動希夷歸至靜  
心閒物自舒光沒燭用秉理性既疎畧勞生豈終永世無  
巢許儔且勿談箕頴

謁蔡忠烈祠

李標

在昔癸未秋喪亂靡遺子流氛自北來旌旗互明滅屹屹  
雲陽墟千官何蹙蹙司李有蔡公孤忠勵高節挺身衛斯  
民丹心百不折罵賊愧偷生賊怒斷公舌飛灑土花紅四  
壁常山血視死誠知歸浩氣凝冰雪我來醴陵坡遙見雙  
栢列瞻拜想遺風慷慨還嗚咽湘水何湯湯嶽麓殊高揭  
先生萬古英崇隆而澄澈

秋日望嶽

郭勸 湘潭人

昨日望南嶽濛濛煙與水今日望南嶽白雲參差起轉瞬  
結晴空祝融了如指羣峯勢挿天倏忽降地底如坐古明  
堂臣服自有比蒼翠飛高深朝夕發嗔喜隱現有無間可  
思不可擬此時高尚人霜華封屐齒我尚未登陟柴門向  
山啓拜手修竹旁心在南山裏

楚鄉詠古八首

張埴 湘潭人

湘山宗衡嶽湘水滙洞庭包舉無涯涘氣象盡南溟清曠  
增憂思哀怨來精靈逐逐塵埃士安知千載心對面言不  
聞而况異古今所以伯牙琴絕響於知音上下百代中俯  
仰感獨深

漢法欽畫一賈生浮湘至過秦以警漢深心有所寄消息

於未萌才高爲身累視遠如視近不用非不智旣負王佐才豈重卿相位寂寞荒江祠猶垂過客淚雖有萬世名深惜當時事

百里可絃歌士元意不屑無乃神駿姿未甘受羈紲廢事似韜光剖斷類果決揚才器則小沉酣詎云劣鳳雛卧龍匹豫州甚明哲驥足且難展豈論疎與拙蟻穴傾隄防一息異悲悅蘭生幽谷中無心求採擷可怪爭名者姿態多曲折

杜甫因流離詩篇益奇創諸侯老賓客踪跡餘骸麟兵戈日月昏登臨每惆悵秋風落魄翁注念勤王將時人笑腐儒作者推大匠可見僅文章難名其器量俗士喜嘖嘖當仁貴不讓波中萍梗身天上蓬萊仗白雲滿山川朝夕清壯悽愴耒陽縣今古遙相望

禮樂致休明君子修其職干戈急軍食細人竭其力民心與天通可見不可測飛鳥去無迹一失難再得明者察隱微仁者宜悽惻粲粲元道州遺愛兼遺直視彼聚斂臣乃謂不如賊感深杜陵老愁絕淚霑臆哀歌散楚雲慘淡瀟湘色

末世競錐刃上可讓天下聖人多憂勞靜者愛閒暇得意兩相忘醇樸無代謝善卷尚有材依依隱桑柘不存高尚心安事崑崙駕浮雲自卷舒清風在田舍嗟嗟縱橫術動色談王霸千年是日月萬古如長夜

長源好大言自負經綸手濟時騁才力事業傳人口詎有  
 神仙骨差可帝王友一室祝融峯間吟堪白首酬恩違素  
 心風塵因奔走高步蹈危機萬事落人後天際見衡山懶  
 殘今在石首間辨白雲何如飲醇酒  
 岳侯忠孝人勤必投袂謀定而後戰取勝若符契八日  
 清湖湘全收上流勢螻蟻不足掃虎狼方受制和議忘復  
 讎乾坤合蒙蔽徧地皆戰場瘡痍日流涕走敵仰雄風生  
 恨不同世

橘洲

王文林

江光四面平昏曉割不定叢竹拂漁舟孤花開仄徑山僧  
 掃石苔放帚便擊磬徒倚有所思登樓動逸興

張旭墨池

陳長鎮武陵

藹若明淥水深松厓幽壑愛茲一鏡圓會心在澹泊長史  
 昔曾臨波濤爭踴躍魚蝦走霜頰蝌蚪皆錯愕遙想落筆  
 時風雨生林薄劍器與擔夫妙理有所托只今墨浪翻香  
 氣滿寥廓溜傳屋漏痕寒浸占釵腳緬懷茫昧初文章局  
 案籥直宰啓龜龍點畫呈河洛盼此一泓深依然在渾噩  
 聖蹟鬼神司烟雲緘秘鑰

秋夜宿汶縣懸虛閣

彭廷梅攸縣人

尋幽在此山秋聲卽吾性一閣啣夕陽半江紅不定澹澹  
 暮雲低漠漠松陰暝遙見隔林燈寒空生遠映有時羣籟  
 絕下界聞夕磬不用閉禪關心與萬緣靜

浯溪

許建鏗

浯溪一片石長寄幽人賞大筆何淋漓穿徑識所昉昔遊  
景已移勝情紛赤想重來際蕭晨清湘駐雙槳初日澄遠  
心水木明秋爽石梁欹半橫絕壁峭以上曲逕乘繁陰流  
泉激清響當境乃自今過目已成曩寂寞塵外踪日見展  
幾兩高秋多白雲空亭自來往

易徵君廬墓圖

湖南學院夏之蓉高郵人

梁園盛才藻發簡多瑰奇珠履互錯落浮薄煽羣兒君子  
崇至行四方仰人師折節王侯交豈在工文詞我溯賣瓜  
瀆流水何清漪鷺鳥靜不驚有樹皆交枝歎息此中人盍  
然古鬚眉還從圖畫裏一問原平衣

